




元史卷九十四

明翰林學士亞中大夫知制誥兼修國史宋濂等修
志第四十三

食貨二

歲課

山林川澤之產若金銀珠玉銅鐵水銀朱砂碧甸子鉛錫礬硝礬
竹木之類皆天地自然之利有國者之所必資也而或以病民者
有之矣元興因土人呈獻而定其歲入之課多者不盡收少者不
強取非知理財之道者能若是乎產金之所在腹裏曰益都檀景
遼陽省曰大寧開元江淞省曰饒徽池信江西省曰龍興撫州湖
廣省曰岳澧沅靖辰潭武岡寶慶河南省曰江陵襄陽四川省曰
成都嘉定雲南省曰威楚麗江大理金齒臨安曲靖元江羅羅會

川建昌德昌柏興烏撒東川烏蒙產銀之所在腹裏曰大都眞定
保定雲州般陽晉寧懷孟濟南寧海遼陽省曰大寧江浙省曰處
州建寧延平江西省曰撫瑞韶湖廣省曰興國郴河南省曰汴梁
安豐汝寧陝西省曰商州雲南省曰威楚大理金齒臨安元江產
珠之所曰大都曰南京曰羅羅曰碩達勒達曰廣州產玉之所曰
于闐曰費里沙產銅之所在腹裏曰益都遼陽省曰大寧雲南省
曰大理澂江產鐵之所在腹裏曰河東順德檀景濟南江浙省曰
饒徽寧國信慶元台衢處建寧興化邵武漳福泉江西省曰龍興
吉安撫袁瑞贛臨江桂陽湖廣省曰沅潭衡武岡寶慶永全常寧
道州陝西省曰興元雲南省曰中慶大理金齒臨安曲靖澂江羅
維建昌產朱砂水銀之所在遼陽省曰北京湖廣省曰沅潭四川
省曰思州產碧甸子之所曰和琳曰會川產鉛錫之所在江浙省

曰鉛山台處建寧延平邵武江西省曰韶州桂陽湖廣省曰潭州
產礬之所在腹裏曰廣平冀寧江浙省曰鉛山邵武湖廣省曰潭
州河南省曰廬州河南產硝礬之所曰晉寧若竹木之產所在有
之不可以所言也初金課之興自世祖始其在益都者至元五年
命于從剛高興宗以漏籍民戶四千於登州棲霞縣淘焉十五年
又以淘金戶二千僉軍者付益都淄萊等路淘金總管府依舊淘
金其課於太府監輸納在遼陽者至元十年聽李德仁於龍山縣
胡碧峪淘採每歲納課金三兩十三年又於遼東雙城及和州等
處採焉在江浙者至元二十四年立提舉司以建康等處淘金夫
凡七千三百六十五戶隸之所轄金場凡七十餘所未幾以建康
無金革提舉司罷淘金戶其徽饒池信之課皆歸之有司在江西
者至元二十三年撫州樂安縣小曹周歲辦金一百兩在湖廣者

至元二十年撥常德豐辰沅靖民萬戶付金場轉運司淘焉在四川者元貞元年以其病民罷之在雲南者至元十四年諸路總納金一百五錠此金課之興革可考者然也銀在大都者至元十一年聽王庭璧於檀州奉先等洞採之十五年令關世顯等於薊州豐山採之在雲州者至元二十七年撥民戶於望雲煽煉設從七品官掌之二十八年又開聚陽山銀場二十九年遂立雲州等處銀場提舉司在遼陽者延祐四年惠州銀洞三十六眼立提舉司辦課在江浙者至元二十一年建寧南劍等處立銀場提舉司煽煉在湖廣者至元二十三年韶州路曲江縣銀場聽民煽煉每歲輸銀三千兩在河南者延祐三年李允直包羅山縣銀場課銀三錠四年李珪等包霍邱縣豹子崖銀洞課銀三十錠其所得礦大抵以十分之三輸官此銀課之興革可考者然也珠在大都者元

貞元年聽民於楊村直沽口撈採命官買之在南京者至元十一年命密且安山等於松阿哩江阿雅勒古江呼蘭果勒江採之在廣州者採於大步海他如鄂諾吹達爾呼圖克三河之珠至元五年徙鳳格等戶撈焉勝州延州納延等城之珠十三年命圖魯卜岱等撈焉此珠課之興革可考者然也玉在費里沙者至元十一年穆爾瑪哈穆特阿里三人言淘玉之戶舊有三百經亂散亡存者止七十戶其力不充而費里沙之地旁近有民戶六十每同淘焉於是免其差徭與淘戶等所淘之玉於古都斯和爾實喇卜丹三人所立水站遞至京師此玉課之興革可考者然也銅在益都者至元十六年撥戶一千於臨朐縣七寶山等處採之在遼陽者至元十五年撥採木夫一千戶於錦瑞州雞山巴山等處採之在徵江者至元二十二年撥漏籍戶於賽音山燭煉凡一十有一所

此銅課之興革可考者然也鐵在河東者太宗丙申年立爐於西
京州縣撥冶戶七百六十煽焉丁酉年立爐於交城縣撥冶戶一
千煽焉至元五年始立洞冶總管府七年罷之十三年立平陽等
路提舉司十四年又罷之其後廢置不常大德十一年聽民煽煉
官爲抽分至武宗至大元年復立河東都提舉司掌之所隸之冶
八曰大通曰興國曰惠民曰利國曰益國曰潤富曰豐寧豐寧之
冶蓋有二云在順德等處者至元三十一年撥冶戶六千煽焉大
德元年設都提舉司掌之其後亦廢置不常至延祐六年始罷兩
提舉司併爲順德廣平彰德等處提舉司所隸之冶六曰神德曰
左村曰豐陽曰臨水曰沙窩曰固鎮在檀景等處者太宗丙申年
始於北京撥戶煽焉中統二年立提舉司掌之其後亦廢置不常
大德五年始併檀景三提舉司爲都提舉司所隸之冶有七曰雙

峯曰暗峪曰銀崖曰大峪曰五峪曰利貞曰錐山在濟南等處者
中統四年拘漏籍戶三千煽焉至元五年立洞冶總管府其後亦
廢置不常至至大元年復立濟南都提舉司所隸之冶有五曰寶
成曰通和曰昆吾曰元國曰富國其在各省者獨江浙江西湖廣
之課爲最多凡鐵之等不一有生黃鐵有生青鐵有青瓜鐵有簡
鐵每引二百斤此鐵課之興革可考者然也朱砂水銀在北京者
至元十一年命蒙古達實以率賓人戶於扎色茂之地採煉在湖
廣者沅州五寨蕭雷發等每年包納朱砂一千五百兩羅管寨包
納水銀二千二百四十兩潭州安化縣每年辦朱砂八十兩水銀
五十兩碧甸子在和琳者至元十年命烏瑪喇探之在會川者二
十一年輸一千餘塊此朱砂水銀碧甸子課之興革可考者然也
鉛錫在湖廣者至元八年辰沅靖等處轉運司印造錫引每引計

錫一百斤官收鈔三百文客商買引赴各冶支錫販賣無引者比私鹽減等杖六十其錫沒官此鉛錫課之興革可考者然也礬在廣平者至元二十八年路鵬舉獻磁州武安縣礬窰一十所周歲辦白礬三千斤在潭州者至元十八年李日新自具工本於瀏陽永興礬場煎烹每十斤官抽其二在河南者二十四年立礬課所於無爲路每礬一引重三十斤價鈔五兩此礬課之興革可考者然也竹之所產雖不一而腹裏之河南懷孟陝西之京兆鳳翔皆有在官竹園國初皆立司竹監掌之每歲令稅課所官以時採斫定其價爲三等易於民間至元四年始命制國用使司印造懷孟等路司竹監竹引一萬道每道取工墨一錢凡發賣皆給引至二十二年罷司竹監聽民自賣輸稅明年又用郭峻言於衛州復立竹課提舉司凡輝懷嵩洛荆襄益都宿并等處竹貨皆隸焉在官

者辦課在民者輸稅二十三年又命陝西竹課提領司差官於輝懷辦課二十九年丞相諤勒哲言懷孟竹課頻年斫伐已損課無所出科民以輸宜罷其課長養數年世祖從之此竹課之興革可考者也若夫硝鹺木課其興革無籍可考故不著焉

天歷元年歲課之數

金課腹裏四十錠四十七兩三錢 江浙省一百八十錠一十

五兩一錢 江西省二錠四十兩五錢 湖廣省八十錠二十

兩一錢 河南省三十八兩六錢 四川省麩金七兩二錢

雲南省一百八十四錠一兩九錢

銀課腹裏一錠二十五兩 江浙省一百二十五錠三十九兩

二錢 江西省四百六十二錠三兩五錢 湖廣省二百三十

六錠九兩 雲南省七百三十五錠三十四兩三錢

銅課雲南省二千三百八十斤

鐵課江浙省額外鐵二十四萬五千八百六十七斤課鈔一千七百三錠一十四兩 江西省二十一萬七千四百五十斤課鈔一百七十六錠二十四兩 湖廣省二十八萬二千五百九十五斤 河南省三千九百三十斤 陝西省一萬斤 雲南省一十二萬四千七百一斤

鉛錫課江浙省額外鉛粉八百八十七錠九兩五錢鉛丹九錠四十二兩二錢黑錫二十四錠一十兩二錢 江西省錫一十七錠七兩 湖廣省鉛一千七百九十八斤

礬課腹裏三十三錠二十五兩八錢 江浙省額外四十二兩五錢 河南省額外二千四百一十四錠三十三兩一錢 硝礬課晉寧路二十六錠七兩四錢

竹木課腹裏木六百七十六錠一十五兩四錢額外木七十三錠二十五兩三錢竹二錠四十兩額外竹一千一百三錠二兩二錢江浙省額外竹木九千三百五十五錠二十四兩江西省額外竹木五百九十錠二十三兩三錢河南省竹木二十六萬九千六百九十五竿板木五萬八千六百條額外竹木一千七百四十八錠三十兩一錢

鹽法

國之所資其利最廣者莫如鹽自漢桑宏羊始權之而後世未有遺其利者也元初以酒醋鹽稅河泊金銀鐵冶六色取課於民歲定白銀萬錠太宗庚寅年始行鹽法每鹽一引重四百斤其價銀一十兩世祖中統二年減銀爲七兩至元十三年旣取宋而江南之鹽所入尤廣每引改爲中統鈔九貫二十六年增爲五十貫元

貞丙申每引又增爲六十五貫至大己酉至延祐乙卯七年之間累增爲一百五十貫凡僞造鹽引者皆斬籍其家產付告人充賞犯私鹽者徒二年杖七十止籍其財產之半有首告者於所籍之內以其半賞之行鹽各有郡邑犯界者減私鹽罪一等以其鹽之半沒官半賞告者然歲辦之課難易各不同有因自疑結而取者解池之顆鹽也有煮海而後成者河間山東兩淮兩浙福建等處之末鹽也惟四川之鹽出於井深者數百尺汲水煮之視他處爲最難今各因其所產之地言之

大都之鹽太宗丙申年初於白陵港三义沽大直沽等處置司設熬煎辦每引有工本錢世祖至元二年又增寶坻二鹽場竈戶工本每引爲中統鈔三兩與清滄等八年以大都民戶多食私鹽因虧國課驗口給以食鹽十九年罷大都及河間山東三鹽運司設

戶部尙書員外郎各一員別給印令於大都置局賣引鹽商買引赴各場關鹽發賣每歲竈戶工本省臺遣官逐季分給之十九年改立大都蘆臺越支三义沽鹽使司一二十五年復立三义蘆臺越支三鹽使司二十八年增竈戶工本每引爲中統鈔八兩二十年以歲饑減鹽課一萬引入京兆鹽運司添辦大德元年遂罷大都鹽運司併入河間

河間之鹽太宗庚寅年始立河間稅課所置鹽場撥竈戶二千三百七十六隸之每鹽一袋重四百斤甲午年立鹽運司庚子年改立提舉鹽權所歲辦三萬四千七百袋癸卯年改立提舉滄清鹽課使所歲辦鹽九萬袋定宗四年改真定河間等路課程所爲提舉鹽權滄清鹽使所憲宗二年又改河間課程所爲提舉滄清深鹽使所八年每袋增鹽至四百五十斤世祖中統元年改立宣撫

司提領滄清深鹽使所四年改滄清深鹽提領所爲轉運司是年
辦銀七千六十五錠米三萬三千三百餘石至元元年又增三之
一焉二年改立河間都轉運司歲辦九萬五千袋七年始定例歲
煎鹽十萬引辦課銀一萬錠十二年改立都轉運使司添竈戶九
百餘增鹽課二十萬引十八年以河間竈戶勞苦增工本爲中統
鈔三貫是年又增竈戶七百八十六十九年罷河間都轉運司改
立清滄鹽使司至二十二年復立河間等路都轉運鹽使司增鹽
課爲二十九萬六百引二十三年改立河間都轉運司通辦鹽酒
稅課二十五年增工本爲中統鈔五貫二十七年增竈戶四百七
十辦鹽三十五萬引至大元年又增至四十五萬引延祐元年以
虧課停煎五萬引自是至天厯皆歲辦四十萬引所隸之場凡三
十有二

山東之鹽太宗庚寅年始立益都課稅所撥竈戶二千一百七十
隸之每銀一兩得鹽四十斤甲午年立山東鹽運司中統元年歲
辦銀二千五百錠三年命課稅隸山東都轉運司四年令益都山
東民戶月買食鹽三斤竈戶逃亡者招民戶補之是歲辦銀三千
三百錠至元二年改立山東轉運司辦課銀四千六百錠一十九
兩是年戶部造山東鹽引六年增歲辦鹽爲七萬一千九百九十
八引自是每歲增之至十二年改立山東都轉運司歲辦鹽一十
四萬七千四百八十七引十八年增竈戶七百又增鹽爲一十六
萬五千四百八十七引竈戶工本錢亦增爲中統鈔三貫二十三
年歲辦鹽二十七萬一千七百四十二引二十六年減爲二十二
萬引大德十年又增爲二十五萬引至大元年之後歲辦正餘鹽
爲三十一萬引所隸之場凡一十有九